

01 潤餅餺

白麗芬

「明仔載你著冗早去菜市仔買潤餅皮呢！」逐年到清明的前一工，阿母定著會叮嚀阿爸。

自我捌代誌以來，若無食著清明的潤餅、五日節的肉粽，就感覺無成咧過節。清明透早我足興綴大人去買潤餅皮，毋但是因為潤餅好食，閣較是憶著欲看人拭潤餅皮。看頭家手裡搦一丸麵粉膏¹，佇平鼎頂扣一个圓籊仔形，潤餅皮薄縐絲的粗坯就出現，餅皮一時仔就熟矣，頭家隨對小可仔敲敲的餅墘拈起來，一塊潤餅皮拭好矣！頭家的面頭前上無有四、五口鼎，對頭一鼎拭到上尾鼎，閣翻來頭前鼎的時，潤餅皮挂好熟矣，共拈起來，順繼拭一塊新的，就按呢一鼎繼一鼎、一輪繼一輪，時間節甲挂挂仔好，無閩縫嘛袂拍損，連鞭就疊一疊潤餅皮矣。有時陣看伊都已經拭矣，煞閣共麵粉膏向餅坯補彈一下，原來是欲共傷厚的斂一寡轉來，抑是共破空的加補淡薄仔。伊跤手扭掠，袂輸咧表演魔術，我看甲目睷毋甘瞞。

潤餅皮買轉來矣，中晝會使餺潤餅囉！阿母共欲餺的料攆甲足豐沛，高麗菜、豆菜、豬肉、豆乾絲恰卵皮攏是主角，啊若塗豆麩、滷苔恰糖粉遮的配角嘛著恰。主角那夾，配角那糝，餺好捲做長株形，上落尾就用蒜仔槓搵寡

tha-má-tò²醬抹予黏咧，按呢就蓋好勢食矣。我較小食，本成一餺就飽 tu-tu 矣，毋過無推第二餺是毋放伊煞，這餺干焦餺一屑仔卵皮，主角換做糖粉恰塗豆麩，阿母攏笑我是胡蠅貪甜。

搬來新竹了後，清明時猶原會數念潤餅餺，上網查著菜市仔有咧拭潤餅皮，就專工走去買，本底掠做會人映人，存範欲恰人排隊矣，啥人知去到地，竟然攏免排隊，敢講新竹人無清明食潤餅這號例？

後來發現竹北市仔嘛有一擔賣潤餅餺的，我三不五時就去交關一餺，雖然恰阿母攆的猶差一氣，總是有較贏無，加減有通過癮啦！

若講著故鄉的滋味，潤餅餺定著排有範，伊好親像是風吹線，共咱恰故鄉牽牢牢，無論風吹飛去佗位，永遠會心悶故鄉味。

¹麵粉膏(kô)

²閣唸做 thā-má-tò

02 海豬救援隊

雨文

古錐的海豬定定佇太平洋坦坦、泗水，雖然有時淡薄仔狡怪，毋過逐家猶是真恰意看伊可愛的模樣。佇臺南四草彼搭有一个「海豬救援站」，毋免去臺東就會當看著海豬，哪會遮好！挂好學校有一門課愛阮去認捌動物，我恰阿君就相招欲來去「救海豬」。佇面冊頂懸，看著有一隻海豬佇北門遐靠沙，就隨去登記，成做海豬救援隊的一份子。

阮全副武裝袂輸欲去做先生，受傷的海豬原來是一隻「大點花」，一下到彼搭，曠闊的救援池內底倚十外个人，逐个人攏注神佇咧共大點花扞予好勢，驚伊去嗾著。看著這個畫面阮一時煞愣去，猶未進入狀況就隨予人叫去鬥相共，連鞭回神參與救援活動。二四點鐘攏愛有醫療人員恰志工相恰照顧大點花，會當講是無暝無日。若有狀況，阮就愛隨記錄落來，原來海豬嘛會破病，而且因為足勢緊張，治療嘛較困難。阮看著疲勞的志工和衰弱的大點花，想欲加做一寡代誌煞無法度鬥跤手，心肝頭不止仔艱苦。

隔轉工阮全時間去看古錐的大點花，希望伊趕緊好起來。趕去的路裡，無張持接著一通電話，共阮講大點花已經過身矣！阮兩人雖罔毋敢相信，猶是想欲去彼搭見伊最後一面。去到遐，伊已經準備欲送去解剖¹，在場每一个人

毋是艱苦，顛倒是忝甲失神失神，阮一句話都毋敢講，驚去拍破這個局面。志工看阮按呢生，就主動恰阮開講，才知影原來這個狀況是真平常。做十幾年矣，干焦有八隻海豬順利活落來，所以逐家攏真慣勢。聽著遮的故事，阮感覺閣較佩服，個干焦會當佇細細間仔的辦公室小眯一下，雖然救轉來的機會茫茫渺渺，毋過猶是繼續拍拚，無放過任何機會。

干焦兩工的陪伴，就親像參與手術房對緊張到平靜的過程，最後的結果啥人都毋知，嘛無人會相詢，一心做家己感覺著的代誌，希望有一工會當看著遮的海豬自由自在做海神的囡仔，為海洋加添色彩。

¹解剖(kái-phóo/kái-phò)

03 我上難忘的風景

拾可慕¹

我毋是一个愛出門的人，平常時散學轉到厝就算無代誌通做，嘛袂想欲出門四界遨。歇暎日有閒的時陣，猶原干焦想欲規日鬱佇厝內。規年當中大概干焦歇寒俗歇熱的家族旅遊，會當予我踏出阮兜，去外面行跔花、四界看看咧。自細漢到今算起來，綴逐家出門迤迤嘛袂少遍，已經袂記得到底去過佻濟所在，毋過總是有一寡風景予我印象足深，若像情景就佇眼前。

有一擺，我拄想講欲趕緊共宿題完成，通好佇厝裡看小說抑是要手機仔，煞予想欲出門迤迤的阿母半揼半揼，恁去行步道。雖罔我起毛稔，落尾嘛是做伙行，共耳機掛起來，三步做兩步，行佇逐家的頭前遠遠遠，干焦想欲較緊行到盡尾好通看冊。毋過當當我沉迷佇音樂優美的旋律，雄雄一陣好聽的鳥仔聲迴過耳機鑽入來我的雙耳，我就按呢共耳機提落來，越頭四界看，想欲揣鳥仔聲是對佗位來的。毋過這陣嘛發覺著，拄才好聽的聲毋知底時完全消失去矣。恬 tsih-tsih 的樹林內干焦賸有若無的鳥仔聲，我目睷金金佇樹林內四界貓貓看，揣甲領頸仔痠，猶原揣袂著聲音美妙的鳥仔。

雖然無法度知影鳥仔聲是對佗位來，但是煞予我注意

著步道四籓輾轉的景緻。路邊有規排的變葉木，彩色的葉仔烏黝紅蔭茄仔色、青翠翠透濫頓點青、黃錦錦炭柑仔色，目睷前五彩的色緻予我看甲無瞞目。四常看袂上目的樹仔，其實逐樣都有小可仔無仝，就算是葉仔，色水嘛有精差，有一寡閣會濫無仝的嬌色。斟酌看，鵲的枝葉內，有的生一掙一掙烏幼的樹子，抑是幼屑屑的花蕊，看著實在是足得人疼，予人想欲挽閣毋甘。

向時所看見的風景，猶原若親像佇眼前，規个面感受著微微仔風吹過來，耳空內聽著鳥仔聲樂暢的感覺，可能因為彼時單獨一人佇林內無別人攪吵，予我完全感受著樹林仔展現的一切。嘛可能是我傷少出門，罕得接近大自然，才會共這個光景深深刻佇頭殼內，永遠難忘。

¹拾可慕(Síp Khó-bōo)